



# Synfocity = 829

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

February 24, 2022

## □ **Synod Executive Committee (SEC) vawi 296-na**

Mizoram Presbyterian Kohhran hnuaiia Committee sang ber, Synod Executive Committee (SEC) vawi 296-na ni thum chhung awch chu Synod Office-a J.M Lloyd Hall-ah February 22 - 24, 2022 chhung hian neih a ni a, Aizawl khawpui chhung atangin member 44 leh Aizawl khawpui pawn atangin member 87, an vaiin member 131 an kal thei.

Committee hi Synod Moderator Rev. Dr. Vanlalnghaka Ralte-in a kaihruai a, Synod Secretary-in reports a pe a, Finance Reports ngaihthlak a ni bawk.

Synod Secretary Rev. Z.D. Lalmachhuana chuan Synod Executive Committee hmasa leh tun inkar-a thil thleng larsar zual report a pe a, kum 2021 Synod Inkhawmpui vawi 98-na neih a nih thu te, January 8, 2022 ah Pastor Bial thar 3 hawn a nih thu te, January 9, 2022 ah Pastor leh Pro. Pastor Induction tluang taka neih a nih thu te, Synod Service Board-in Contract Missionary 50 a lak thar thu te, January 27, 2022 khan Baptist Church of Mizoram (BCM) hotute leh OM member-te Kohhran Inpumkhatna thu sawia inkawmhona, Synod Officers' Room-ah neih a nih thu te, February 1-4, 2022 chhung khan Synod Conference Centre-ah Pro. Pastor Orientation neih a nih thu te, Synod Hospital-a Khualbuk, mipa 16 leh hmeichhia 14 riahna awm chu hman theih turin peih fel a nih thu te, USA-a tlawmngai pawl pakhat, Programme for Appropriate Technology in Health (PATH) India hnen atanga dawn, Oxygen siamna khawl Pressure Swing Absorbition (PSA), cheng nuai 130 man lai chu hman theiha buatsaih fel a nih thu te, Mission Development Training Centre (MDTC), Bualpui North-ah Veterinary Clinic building thar chu February 9, 2022 khan Rev. Dr. K. Lallawmzuala, Executive Secretary i/c Mission-in a hawn thu te, Revocation Certificate (RC) mi 66 leh Re-marriage License (RL) mi 92 hnenah pek an nih thu te chu report langsar zualte an ni.

Tun tumah hian thu ngaihtuah tur pawimawh 49 zet chhawpchuah a ni a, chung zingah chuan Central KṚP Leader thlan & General Secretary ruat chungchang te, Mizoram Christian College (MCC) Principal thlanna te, Zirnain hma a sawn theih nana Sawrkar leh Synod thawhho dan zawn rawtna te, Act East Policy Synod-in lo zir chianga hma lak rawtna te, Synod-in Kohhran hmahlir research base-a neih rawtna te, Kristian ni pawimawh humhalh tura hmalak chungchang te, Presbyterian English School (PES) din tan kum tihchian rawtna te leh Myanmar ram buai avanga Mizorama ralhlante Synod hminga tanpui rawtna te chu a langsar zual an ni.

SEC 296-na neih mek chuan Mizoram Christian College Principal (2022-2024) atan Upa Dr. Tawnenga, Mission Veng a thlang a, Central KṚP Leader (2022-2024) atan Rev. Dr. F. Pachhunga, Luangmual leh General Secretary atan Upa Rochungnunga, Synod Office a thlang bawk.

## □ **Mizoram Synod Hruaitute leh Mizoram Governor ten inkawmhona an nei**

February 21, 2022 (Thawhtanni) khan Mizoram Presbyterian Kohhran hruaitute leh Mizoram Governor Pu Hari Babu Kambhampati ten Raj Bhavan-ah inkawmhona hun an hmang a, mipui vantlang tana hmalakna tangkai tur leh tunlai Mizoram chhunga thil thleng pawimawh deuh te an sawiho.

Governor chuan Mizoram chhunga Kohhran leh Tlawmngai pawl hrang hrang ten mipui vantlang hmasawna atana sawrkar tha taka an thawhpui thin avang te, anmahni senso nena state hmasawna atan an luangchhuak thin chu state danga NGO leh sakhaw dang vuantute tan pawha entwain tlak leh chhuanawm a ni tih a sawi a. Hripui leng avanga harsatna a thlen lai te, buaina lian tham deuh a thlen chang te, sakhaw hrang hrang betute inkarah inunau na a awm theih na atan leh mi harsa te tanpui kawngah Kohhran ten theih tawp an chhuah thin chu ropui a tih thu sawiin sawrkar an thlawpnaah lawmthu a sawi bawk.

Mizoram Synod hruaitute chuan Mizoram sawrkar leh Kohhrante chu englai pawha Mizoram hmasawna tura lungruak taka thawkho thin an ni tih Governor hnenah hian an sawi a. Mizoram chhunga remna leh muanna a awm theihna atan te, zirna tih hmasawna, inthlanna thianghlim a awm theihna tura hmalaknaah te, mipui vantlang tana luanchhuah kawngah leh sawrkar thlawp a ngaihna laiah te kohhran ten theih tawp an chhuah chhunzawm zel tih an sawi a ni.

- ❑ **Synod Hospital, Durtlang a hman tur Oxygen plant khawl thar hawng**  
 February 21, 2022 thawhtanni chawhnu dar 3 khan Health Minister Dr. R. Lalthangliana'n PSA Oxygen plant khawl thar Synod Hospital Campus-ah a hawng.  
 Oxygen Plant khawl thar hawwna program hi Dr. Lalthakima, Director Synod Hospital-in a kaihruai a, Rev. Dr. Vanlalngbaka Ralte, Moderator Mizoram Synod-in Pathian hnena hlanna hun a hmang. Pu Nitesh Gangware, Operation Manager, Program for Appropriate Technology in Health (PATH)-in Technical report a pe a, Dr. John Malsawma, Medical Superintendent-in lawmthu a sawi a ni.  
 Hemi rual hian Health Minister Dr. R. Lalthangliana'n oxygen concentrator pahnih Synod Hospital tan a penghal a ni. Oxygen plant hi Program for Appropriate Technology in Health (PATH), Seattle, USA leh GiveIndia ten an pek a ni a, oxygen plant atana senso zawng zawng hi Google Company in an tum thung a ni.
- ❑ **Synod Mission Board leh ram pawn chet velna**
- ◆ **Jharkhand Mission Field**  
 February 14, 2022 (Thawhtanni) khan ringthar 1 Lal Isua zui turin a inpe a. February 16, 2022 (Nilaini) khan ringthar 2 Lal Isua zui turin an inpe a, Friends Missionary Prayer Band(FMPB) atangin mi 1 kan Kohhranah a inpe bawk.  
 February 17, 2022 (Ningani) khan Siristola Biak In thar chu Field Secretary-in a hawng. Biak In len zawngh hi 30' x 18' a ni. Biak In sakna tur hian Chanmari Kohhran, Aizawl-in Rs. 2,50,000/- an thawh a. Hemi ni hian ringthar 3 Lal Isua zui turin an inpe bawk.  
 February 20, 2022 (Pathianni) khan ringthar 6 Lal Isua zui turin an inpe.
  - ◆ **Siligury Mission Field**  
 February 19, 2022 (Inrinni) khan ringthar 8 Lal Isua zui turin an inpe.
  - ◆ **Assam Mission Field**  
 February 20, 2022 (Pathianni) khan ringthar 1 Lal Isua zui turin a inpe.
  - ◆ **Delhi Mission Field**  
 February 20, 2022 (Pathianni) khan ringthar 1 Lal Isua zui turin a inpe.
  - ◆ **Arunachal & Assam Mission Field (West)**  
 February 20, 2022 (Pathianni) khan ringthar 1 Lal Isua zui turin a inpe.
  - ◆ **Arunachal & Assam Mission Field (East)**  
 February 20, 2022 (Pathianni) khan ringthar 2 Lal Isua zui turin an inpe.
- ❑ **MSSU Day**  
 February 20 (Pathianni) kha MSSU Day vawi 124-na a ni a. Kohhran tirha Mizorama missionary lo kal hmasa ber Rev. D.E. Jones (Zosaphluia), August 31, 1897-a lo thleng chuan a pianchamphaphak vawi 28-na, February 15, 1898 (Thawhlelni)-a hawn turin Hrianghmun mual, tuna Synod Bookroom leh Synod Press inkar (Zosaphluia building awmna)-ah rap In-in sikul a sa a. Chu sikul-ah chuan February 20, 1898-ah Sunday School a neihpui a. Hei hi Synod 2003:16 na chuan Mizorama Sunday School din tan ni-ah a pawm a ni.  
 Synod Inkhawmpui 2021 report-a a lan danin MSSU dinhmun tlangpui chu hetiang hi a ni -
- |                               |            |
|-------------------------------|------------|
| Thawktu zat                   | - 5        |
| Zirtirtu                      | - 43,968   |
| Zirlai                        | - 3,44,177 |
| Zirtirtu leh zirlai belhkhawm | - 3,88,145 |
- Covid 19 hripui leng avangin kum 2021 khan Bial Sunday School Inchhiarna Report a lut kim thei lo va. Bial 137 atangin report a lut a, inchhiarna hi kum hlui report nen khaikhawma siam a ni.
- ❑ **Synod Relief Fund**  
 Tun hnaia harsatna hrang hrang nei te hnenah Synod Relief Fund atangin hetiang hian chhawmdawlina pek a ni.
- | S.No | Khua          | Pek chhan     | Chhungkaw zat | Pek zat             |
|------|---------------|---------------|---------------|---------------------|
| 1.   | Airfield Veng | Khawsak harsa | 2             | Rs. 16,000/-        |
| 2.   | Kananthar     | In kang       | 3             | Rs. 26,000/-        |
|      |               |               | <b>TOTAL</b>  | <b>Rs. 42,000/-</b> |
- January 2022 chhung khan Synod Relief Fund atangin harsatna hrang hrang neite hnenah chhawmdawlina Rs. 52,000/- sem a ni.

- ❑ **KTP**  
KTP Rorel Inkhawmin alo rel tawh KTP member tena Synod Hospital-a damlo mi harsa te tanpui nan thawhlawm an thawh 'Hospital Charity Pual' Rs. 6,67,131/- chu February 23, 2022 (Nilaini) khan CKTP Leader leh CKTP committee member ten Synod Hospital Director hnenah an hlan a, Grace Home cook mi 2 tana hlawh an tumsak thin chu an pe bawk.
- ❑ **Synod Revival**  
February 19 & 20, 2022 khan Operation Nehemia neiin Aizawl leh Dai velah Revival Speaker-te group 12-ah inthenin mi 1165 hnenah rawngbawlina an nei. Operation Nehemia hi February 26 & 27, 2022 -ah neih leh a ni ang.
- ❑ **Hruaina Eng FM Radio :**  
**FEBRUARY 25, 2022 (Zirtawpni) (FM Zoawi - Aizawl & Lunglei @ 7:30 p.m.):**  

<i>Solo</i>	: Vanlalsailova - Aw rinna thuk nei ila
<i>Zaipawl</i>	: Nursery Veng Kohhran Zaipawl - Chawimawi ru
<i>Thusawi</i>	: Rev. Zothansanga - A ram leh a felna
<i>Solo</i>	: B. Lalrohlu - Muanna Pathian
<i>Zaipawl</i>	: Champhai Vengthlang Bial Zaipawl - I chawimawi ang u
- ❑ **Susamachar Prasaran Programme :**  
**FEBRUARY 27, 2022 (Pathianni) 5:00 pm. :**  

<i>Group/Choir/Solo</i>	: Durtlang Kohhran Masihi Sangati - Halleluia Stuti
<i>Group/Choir/Solo</i>	: Hmingtea Tochwawng - A nugra ha kari
<i>Sermon</i>	: Rev. P.C. Rohlira
<i>Group/Choir/Solo</i>	: P.C. Lianhmingthanga - Sahara
<i>Group/Choir/Solo</i>	: Bungkawn Masihi Sangati - Ji Uthe
- ❑ **Moderator leh Executive Secretary-te Programme:**  

<b>Rev. Dr. Vanlalnghaka Ralte : Moderator</b>	
Feb. 28, 2022	MKHC Programme
March 1, 2022	Missionary tirschhuah inkhawm
<b>Rev. C. Zoramawia : Senior Executive Secretary</b>	
March 2, 2022	PCI Executive committee, Silchar
<b>Rev. V.L. Luaia Hranleh : Executive Secretary</b>	
March 1, 2022	Synod Hospital Doctor te nen inkawmho
March 3, 2022	College of Nursing Managing committee
<b>Rev. Dr. K. Lallawmzuala : Executive Secretary</b>	
Feb. 28, 2022	MTC Programme
March 1, 2022	Missionary tirschhuah inkhawm
March 2, 2022	PCI Executive committee, Silchar
March 4, 2022	PES committee

**Synod HSS Class IX Entrance Exam chungchang**

1. Candidate Roll No. hi School Website [www.synodhss.com](http://www.synodhss.com)-ah March 1, 2022 atangin en theiha tarlan a ni ang.
2. Date of written test : March 4, 2022 (Friday) 10:00am - 1:00pm
3. Subjects : Mathematics, English with GK (40 + 40 + 20 = 100)
4. Date of Result Publication : March 14, 2022 (Monday) 11:00am
5. Date of Admission : March 14-17, 2022  
Admission hi **Online**-a tih tur a ni ang.

Sd/-  
Zirkungi Chhakchhuak  
Principal  
Synod Higher Secondary School

### HNA RUAK DIL THEIH

Mizoram Presbyterian Kohhran, Campus Ministry hnuaiia thawk turin Counsellor 1 (pakhat) contract-a thawk tur lak a ni dawn a, kum 18-35 inkar, ni 18.3.2022-a kum 18 tling, kum 35 la pumhlum lo, zuk leh hmuama fihlim, Presbyterian Kohhran mi tan dil theih a ni. Hna dilna Form chu 16.2.2022 (Nilaini) atangin nitin dar 10:00am - 2:00pm inkarah Synod Office (Aizawl leh Lunglei)-ah lakchhuah theih a ni ang. Dilna hi Synod Office, Aizawl-ah thehluh tur a ni a. Application form man Rs. 20/- a ni. Hna dilna Form-ah hriat tur pawimawh tihlan a ni.

Thiamna : Graduate of any recognised University and B.Miss/BD and above recognised by the Senate of Serampore/Synod (Preferably experienced in Counselling)  
Hlawh : Synod hnuaiia contract Counsellor hlawh

**Dil theih hun chung** : Dt. 14.3.2022 (Thawhtanni), 2:00pm thleng  
**Screening test/exam** : Dt. 16.3.2022 (Nilaini), 10:00 am  
**Interview** : Dt. 18.3.2022 (Zirtawpni), 11:00am

Sd/-  
Rev. C. Zoramawia  
Secretary, Synod Service Board  
Synod Office

### PATHIAN THU ZIR DUH TAN

Presbyterian Bible School, Mission Veng-ah Certificate in Theology (C.Th) Admission hawn a ni a. Dil duhte tan a hnuaiia tarlan hi hriat tur a ni e.

Admission Form : Office hun chungin Rs. 10/- a lei theih a ni  
Dil hun chung : April 26, 2022 (Thawhlehi) tlai dar 3:00 thleng  
Dil thei chin : Class VII passed, kum 16 chin, Kohhran dan chhunga awm  
Interview : April 28, 2022 (Ningani) chawhma dar 10:00  
Class tan hun : May 3, 2022 (Thawhlehi)  
Zir hun chung : May - August, 2022

Hrechiang duh tan Phone No. **0389-2317343/8296035491**-ah zawhfiah theih a ni.

Sd/-  
Rev. Lalrinsanga  
Principal  
Presbyterian Bible School

### KOHRAN HMEICHHE ROREL INKHAWM HUN SAWN THU

Mizoram Presbyterian Kohhran Hmeichhe Rorel Inkhawm vawi 11-na chu March 11-13, 2022-a Mission Veng Kohhran Biak In-a neih tura ruahman a ni a. Amaherawhchu Kohhran Hmeichhia Central Committee chuan kan rama hripui (Covid-19) leng dinhmun enin Synod Offices' Meeting (OM) remtihain **"Kum 2022 Kohhran Hmeichhe Rorel Inkhawm chu ni khat chauh hman ni se, a hun atan May 26, 2022 (Ningani) ni se"** tiin a rel a. Hei hi an huam chhunga Pastor Bial hrang hrang leh Kohhrante an hriattir a ni.